



Pou Piblikasyon Imedya: 22/02/2022

GOUVÈNÈ KATHY HOCHUL

## GOUVÈNÈ HOCHUL ANONSE KREYASYON SANT OPERASYON SEKIRITE KONJWENT POU SIPÈVIZE SEKIRITE ENFÒMATIK ATRAVÈ ETA A

*JSOC New York pral sèvi kòm premye sant nan jan li pou pataj done ak kowòdinasyon sistèm enfòmatik atravè Eta New York, Vil New York, senk gwo vil nan nò Eta a, gouvènman lokal ak reyonal yo, enfrastrikti enpòtan ak patnè federal yo*

*Anons lan chita sou envestisman san parèy 61.9 milyon dola Gouvènè Hochul la nan enfrastrikti sekirite enfòmatik Eta a nan kad bidjè ane fiskal 2023 a*

*Gouvènè a pwopoze nouvo pwogram istorik 30 milyon dola pou lokalite yo pou ede ranfòse defans sibènetik nan tout eta a*

Gouvènè Kathy Hochul te anonse jodi a kreyasyon yon Sant Operasyon Sekirite Konjwent (Joint Security Operations Center, JSOC) nan Brooklyn ki pral sèvi kòm sant nève pou inisyativ sibènetik lokal, eta ak federal konjwent yo, sa gen ladan koleksyon done, efò repons yo ak pataj enfòmasyon. Yon patenarya te lanse avèk Majistra Vil New York Eric Adams, Majistra Albany Kathy Sheehan, Majistra Syracuse Ben Walsh, Majistra Buffalo Byron Brown, Majistra Rochester Malik Evans, Majistra Yonkers Mike Spano ak lidè sekirite enfòmatik yo atravè Eta a, JSOC se premye sant kòmann sibènetik nan jan li ki pral bay yon vizyon nan nivo tout eta a sou peyizaj menas sekirite enfòmatik ak amelyore kowòdinasyon sou ransèyman pou menas ak repons a ensidan.

"Gen yon nouvo kalite risk k ap parèt ki menase lavi chak jou nou yo epi menm jan pandan n ap amelyore enfrastrikti sekirite fizik nou apre 9/11, nou dwe kounye a transfòme fason nou apwoche sekirite enfòmatik avèk menm rijidite ak nivo serye", **Gouvènè Hochul te deklare.** "Mwen fyè pou m anonse patenarya dinamik ak inovatè sa a pou etabli Sant Operasyon Sekirite Konjwent lan an kolaborasyon avèk Vil New York, vil nan reyion nò nou yo epi lidè nan gouvènman ak biznis yo atravè eta a. Sekirite Enfòmatik te yon priyorite pou administrasyon mwen an depi 1ye jou a, epi sant kòmann sa pral ranfòse kapasite nou pou pwoteje enstitisyon, enfrastrikti New York nou yo, sitwayen nou ak sekirite publik la".

Kolaborasyon inovatè sa a te ankou depi plizyè mwa epi li se rezulta vizyon ak angajman bonè Gouvènè Hochul ak ekip li a pou amelyore posti Eta a nan zafè sekirite enfòmatik. Okenn lòt eta pa te reyini ansanm ekip sekirite enfòmatik yo nan yon espas

kòmann pataje nan anplè sa, sa gen ladan gouvènman federal, eta, vil ak konte yo, biznis enpòtan yo ak konpayi sèvis publik yo, ak antite eta yo tankou Divizyon Sekirite Nasyonal ak Sèvis Ijans yo, Biwo Sèvis Teknoloji Enfòmasyon yo, Lapolis Eta New York, MTA (Otorite Transpò Metropolis), Otorite Pòtyè New York ak New Jersey, Otorite Enèji New York, pamì lòt yo.

Lidèchip New York nan finans, enèji, transpò, swen sante ak lòt domèn enpòtan fè Eta a tounen yon sib enteresan pou atak sibènetik ki kapab deranje operasyon yo, sa gen ladan enfrastrikti ak sèvis pou sitwayen yo. Pandan antite gouvènman an yo atravè Eta a te istorikman itilize yon apwòch endepandan pou defans sibènetik ak pwoteje sekirite lòt resous teknologik yo, aji sèl pa favorab ankò. Amezi frekans ak sofistikasyon atak sibènetik yo te ogmante, nesesite pou yon apwòch "tout gouvènman" an te ogmante tou.

JSOC, ki gen syèj sosyal nan Brooklyn epi ki gen patisipan fizik ak vityèl atravè eta a, pral amelyore defans yo nan otorize ekip sibènetik yo pou jwenn yon pwennvi santralize sou done menas yo. Sa pral pote pi bon kolaborasyon sou ransèyman sou menas la, rediksyon nan tan repons yo ak solisyon pi rapid nan ka ta gen yon gwo atak sibènetik. Sa pral ede antite k ap patisipe yo pou reponn ak pwoblèm potansyèl yo epi leve tandans sistemik yo ki ka te pase san yo pa detekte sa. Apwòch sa pwofite tout resous defans sibènetik yo nan nivo eta, vil, lokal ak otorite yo anba yon menm parapli.

Eta New York pral kolabore avèk dirijan vil ak rejjonal yo sou fòmasyon sekirite enfòmatik ak egzèsis yo amezi JSOC vin fonksyonèl pandan mwa k ap vini yo. Gouvènè a ak ekip li a pral kontinye konvèrsasyon ki ankou yo avèk Mezon Blanch ak patnè federal yo pou asire kowòdinasyon.

Sa chita sou pwopozisyon istorik Gouvènè Hochul la nan bidjè ane sa a pou envestisman nan pwoteksyon sibènetik Eta New York yo, sa gen ladan 61.9 milyon dola pou sekirite enfòmatik, sa ki double envestisman anvan an. Envestisman sa yo pral finanse pwoteksyon enpòtan, sa gen ladan ekspansyon pwogram Ekip Wouj sibènetik eta a pou bay tès penetrasyon siplemantè, yon pwogram egzèsis phishing (fwòd) elaji, analiz vilnerabilite ak sèvis siplemantè pou repons ak pwoblèm sibènetik yo. Envestisman sa yo ede asire ke si yon pati nan rezo a atake, Eta a kapab izole ak pwoteje rès sistèm lan.

Nan kad pwopozisyon sa a, Gouvènè a ap pwopoze tou yon pwogram "sèvis pataje" 30 milyon dola pou ede gouvènman lokal yo ak lòt patnè rejjonal yo akeri ak deplwaye sèvis sekirite enfòmatik bon kalite pou ranfòse defans sibènetik yo. Nati entèkonekte rezo yo nan eta a ak pwogram Teknoloji Enfòmasyon yo vle di atak yo kapab pwopaje byen vit atravè eta a. Anpil antite gouvènman an souvan pa gen finansman oswa resous nesesè pou pwoteje sistèm yo, kote kèk bay sèvis enpòtan tankou swen sante, aplikasyon lalwa, jesyon ijans, tretman dlo ak asirans chomaj, pou site kèk sèlman.

**Kajistra Vil New York la, Eric Adams, te deklare**, "Vil New York se yon sib prensipal pou sila yo ki vle atake enfrastrikti sibènetik nou pou lakòz destrikson. Pandan

Kòmann Sibènetik Vil New York la deja se yon modèl nasyonal pou anpeche menas sa yo, li lè pou sekirite enfòmatik nou an pase nan yon lòt nivo. Nou konnen lè sa gen pou wè ak atak sibènetik, diferans ant yon ti deranjman ak yon katastwòf se yon bagay ki ka jis pran kèk minit. Se poutèt sa novo Sant Operasyon Sekirite Konjwent lan pral itilize yon apwòch entegre ak global pou ranfòse defans sibènetik nou yo atravè eta a. Mwen remèsyé Gouvènè Hochul ak konpatriyòt Majistra yo pou patenarya yo epi mwen pa ka tann pou m travay ak yo pou fè fas ak menas komen sa".

**Direktè Ajans Sekirite Enfòmatik ak Sekirite Enfrastrikti, Jen Easterly, te deklare,** "Nan monn jodi a ki entèkonekte globalman, tout moun jwe yon wòl nan pwoteje Ameriken yo kont menas atak sibènetik yo. Ajans Sekirite Enfòmatik ak Sekirite Enfrastrikti (Cybersecurity and Infrastructure Security, CISA) aplodi kreyasyon JSOC New York la, kòm dabitud, ki rete pare pou fè patenarya avèk eta nou an ak omològ lokal yo nan kenbe enfrastrikti New York la san danje ak sekirize. Repons sou ensidan sekirite enfòmatik pwoaktif la ak planifikasyon rekiperasyon an pral ede diminye risk ak asire yon repons inifye lè yon ensidan rive. Kolaborasyon nan kè misyon CISA epi nou pa ka tann pou nou sipòte inisyativ sa a pandan I ap vin operasyonèl".

**Komisè Divizyon Sekirite Teritwa ak Sèvis pou Ijans Eta a (Division of Homeland Security and Emergency Services), Jackie Bray, te deklare,** "Gras ak lidèchip ak vizyon Gouvènè Hochul, n ap pote yon apwòch entegre, nan tout eta a pou sekirite enfòmatik avèk patnè gouvènman nou yo. JSOC pral tounen sant nèye pou kolekte ransèyman sou menas potansyèl yo, veye anvayisè ak enfraksyon yo, epi reponn ak menas kont sekirite enfòmatik yo ak ensidan yo".

**Direktè Enfòmasyon Biwo Sèvis Teknoloji Enfòmasyon Eta New York la, Angelo 'Tony' Riddick, te deklare,** "Angajman Gouvènè Hochul pou pwoteje enfrastrikti eta nou an ak enfòmasyon pèsonèl tout Nouyòkè yo te yon priyorite depi premye jou li nan biwo. Nouvo nòmal risk sibènetik konstan yo menase chak nivo gouvènman an, kidonk nou dwe pran mezi inovatè epi travay ansanm. Kreyasyon yon JSOC pral pi byen pwoteje enfòmasyon nou yo epi asire nou rete ankò pi vijilan kont krim sibènetik yo pandan n ap kenbe Nouyòkè yo an sekirite".

**Sipè-entandan Lapolis Eta New York la, Kevin Bruen, te deklare,** "Kolaborasyon ak pataj enfòmasyon enpòtan anpil lè sa gen pou wè ak bay sekirite epi evalye menas yo. Nou apresye efò Gouvènè Hochul pou fòme patenarya inovatè sa a, ki pral ede ranfòse efò sekirite enfòmatik yo ak amelyore repons pou ensidan alavni yo".

**Direktè Egzekitif Otorite Pòtyè a, Rick Cotton, te deklare,** "Pwoteksyon ak sekirite enstalasyon transpò Otorite Pòtyè yo rete pi gwo priyorite Otorite Pòtyè a - sa gen ladan yon konsantrasyon san pran souf sou sekirite enfòmatik. Nou aplodi Gouvènè Hochul, Majistra Adams ak dirijan yo atravè eta a dèsk yo kreye JSOC la ki pral ranfòse kapasite ajans gouvènman yo pou idantifye, bay resous ak aplike pi bon pratik yo pou konbat menas sibènetik yo pandan yo kontinye evolye".

**Prezidan ak Direktè Egzekitif Jeneral Pwovizwa Otorite Enèji New York, Justin E. Driscoll, te deklare**, "Tankou pi gwo konpayi sèvis publik peyi a nan eta a, sekirite enfòmatik gen anpil enpòtans pou NYPA. Nou rekonesan anvè patnè vil ak eta nou an yo pou kolaborasyon yo nan kreye JSOC. Sant sa pral ede NYPA kenbe sistèm nou yo an sekirite ak pèmèt nou kontinye jenere elektrisite pwòp ak kenbe yon tyè nan sistèm transmision eta a san ensidan oswa deranjman, tout sa pandan n ap founi yon apwòch ki konsidere tout eta a pou pwoteje Eta New York kont nouvo menas yo".

**Prezidan ak Direktè Egzekitif Jeneral MTA, Janno Lieber, te deklare**, "Kolaborasyon ant ajans yo se kle pou bay pi bon defans sibènetik. Nou pa ka tann pou n pataje enfòmasyon ak ekspètiz sou sistèm sekirite enfòmatik MTA ki gen plizyè kouch pandan n ap travay pou nou pwoteje eta a kont menas potansyèl".

**Majistra Albany an, Kathy Sheehan te deklare**, "Chak jou, Vil Albany - tankou òganizasyon yo atravè peyi a - defann tèt li kont atak enfòmatik ki soti toupatou nan monn lan. Kòm viktim yon atak lojisyèl malveyan (ransomware) an 2019, Vil Albany konnen trè byen enpak menas kont sekirite enfòmatik kapab genyen sou sistèm yo ki sèvi rezidan nou yo ak pwoteje enfrastrikti nou an. Erezman, Eta New York te la pou nou lè sa te pi enpòtan, epi kounye a nou pral fè patenarya yon fason pwoaktif nan Sant Operasyon Sekirite Konjwent lan pou ede idantifye ak reponn ak menas sekirite enfòmatik yo non sèlman pou vil nou an men tou pou ajans lokal ak eta yo atravè New York. Mwen remèsy Gouvènè Hochul, Komisè Bray ak Direktè Enfòmasyon Riddick dèske yo fè envestisman sa ak ranfòse patenarya vital yo ki pral ede pwoteje tout eta nou an".

**Majistra Buffalo Byron Brown te deklare**, "Atak sibènetik yo se yon nouvo menas ki mande pou gouvènman eta ak lokal yo dwe pran mezi rapid pou pwoteje kont sa, epi mwen rekonesan dèske Gouvènè Hochul gen vizyon pou aplike yon apwòch global, nan tout eta a pou asire sekirite nou. Mwen kontan ke Buffalo fè pati lansman premye Sant Operasyon Sekirite Konjwent sa ki se premye nan jan li ki pral mete nou nan pozisyon kote n ap pi byen prepare pou anpeche, pwoteje, reponn ak rekipere anba atak sibènetik yo".

**Majistra Rochester, Malik Evans, te deklare**, "Nou pa ka tann pou nou travay avèk eta a ak lòt patnè minisipal nou yo pou rezoud pwoblèm enpòtan sa kont sekirite enfòmatik. Nou apresye envestisman Gouvènè a pou pwoteje done nou yo. Nenpòt atak sou sistèm enfrastrikti teknik nou yo se yon atak toutbon sou sitwayen n ap sèvi yo, kidonk, ranfòse defans nou yo se yon inisyativ ki vreman vo lapèn".

**Majistra Syracuse Ia, Ben Walsh te deklare**, "Sekirite enfòmatik se yon defi chak òganizasyon nan sektè publik ak prive a fè fas chak jou. Vil yo ap fè fas ak vilnerabilite, menas ak risk ki parèy. Atravè JSOC, nou pral pi byen kapab pataje ransèyman ak solisyon epi pi byen pwoteje resous enpòtan nou yo ak popilasyon n ap sèvi a. Mwen remèsy Gouvènè Hochul dèske li pa sèlman bay resous ak kominote nou yo men tou dèske li kreye yon sant kòmann pou eta a kapab pataje plis done, enfòmasyon ak ekspètiz pou fè fas ak risk sa k ap evolye. Nou toujou pi djanm lè nou travay ansanm".

**Mike Spano, ki se Majistra Yonkers, te deklare**, "Vag resan atak kont sekirite enfòmatik yo sèvi kòm yon apèl vijilans pou vil yo atravè peyi nou an. Mwen remèsyé Gouvènè Hochul pou apwòch pwoaktif li nan bay Majistra yo, ki se jeneral avangad yo, yon plas sou tab la pou travay youn ak youn avèk kèk nan lespri ki pi entelijan sou defans sekirite enfòmatik nan peyi a pandan n ap amplifye sekirite enfòmatik nou".

###

Lòt nouvèl disponib sou sit [www.governor.ny.gov](http://www.governor.ny.gov)  
Eta New York | Chanm Egzekitif | [press.office@exec.ny.gov](mailto:press.office@exec.ny.gov) | 518.474.8418

[ANILE ENSKRIPSYON OU](#)